



Yesu Alifundisha Bidii ya Kazi kwa

Mfano Wake Mwenyewe

Lo lote mkono wako utakalolipata kulifanya, ulifanye kwa nguvu zako; kwa kuwa hakuna kazi, wala shauri, wala maarifa, wala hekima, huko kuzimu uendako wewe.—**Mhubiri 9:10.**

Katika mavazi rahisi ya mfanyakazi wa kawaida alipita katika barabara za mji mdogo, akienda na kurudi katika kazi Yake ya hali ya chini. Hakutumia miujiza ya mbinguni kumsaidia kufanya kazi.

Kadiri Yesu alivyofanya kazi katika utoto na ujana Wake, akili na mwili vilikua. Hakutumia nguvu Zake za mwili kizembe, bali alizitumia ili awe na afya ya kumwezesha kutenda kazi barabara. Hakuwa mzembe katika shughuli, hata kushika vyombo vya kazi ya useremala. Alikuwa kamili katika kazi kama alivyokuwa kamili katika tabia. Aliweka kielelezo kwamba kazi yapaswa kutendwa kwa ukamilifu, maana kazi ni kitu cha heshima. Zoezi ambalo linaifundisha mikono kutumika na kuwafundisha vijana kubeba sehemu yao ya mizigo ya maisha huupatia mwili nguvu, na hukuza kila kipaji. Wote wanapaswa kutafuta kitu cha kufanya ambacho kitawaletea manufaa wao wenyewe na kuwasaidia wengine. Mungu aliiweka kazi kuwa kitu cha mbaraka, na mfanyakazi hodari tu ndiye anayepata furaha maishani. Mungu huwakubali watoto na vijana wanaofanya kazi kamili nyumbani kwao, huku wakishiriki mizigo ya kazi pamoja na baba zao na mama zao. Watoto kama hao watatoka nyumbani na kuwa watu wenye manufaa katika jamii.

Katika maisha Yake yote duniani, alikuwa ni mfanyakazi mwenye bidii na thabiti. Alitarajia mambo makuu, kwa hiyo alijaribu mambo makuu pia. Yesu hakukwepa kazi yoyote, au wajibu kama watu wengine wafanyavyo leo, huku wakijiita kuwa wafuasi Wake. Kwa uhodari na nguvu, uthabiti na uwezo wa tabia, uliooneshwa katika Kristo unapaswa kuendelezwa ndani yetu, kupitia nidhamu ile ile aliyoidumisha. Na neema ile aliyoipokea ni kwa ajili yetu....

Katika kazi Yake Yesu aliifanya kwa uchangamfu na hekima. Inahitaji uvumilivu mwingi na ukomavu wa kiroho ili kuleta dini ya Biblia katika maisha ya nyumbani na kazini, kubeba mzigo wa kazi za duniani na bado ukaendelea kufanya yote kwa utukufu wa Mungu. Hapa ndipo Kristo alikuwa msaidizi. Kamwe hakujazwa na masumbufu ya dunia kiasi cha kukosa muda au tafakari kwa mambo ya mbinguni. Kila mara Yesu alionesha furaha ya moyo Wake kwa njia ya kuimba Zaburi, na nyimbo nyingine za mbinguni. Mara kwa mara wenyeji wa Nazareti walimsikia akiimba nyimbo za sifa na shukrani. Aliwasiliana na mbingu katika nyimbo; na wenzake walipokuwa wakilalamika kwa sababu ya kuchoka, walichangamshwa kwa nyimbo alizoimba. Kusifu Kwake kulionekana kuwafukuza malaika waovu, na kama manukato kulilifunika lile eneo kwa harufu nzuri. Akili za wasikilizaji Wake zilihamishwa kutoka uhamishoni kwao duniani, na kupelekwa nyumbani mbinguni (Tumaini la Vizazi Vyote, sehemu ya 1, uk. 52-54).